


B. N. C.  
FIRENZE  
1072  
19





1072.12





# ADVIS

donné

Par Monsieur le Marechal  
des Diguieres,

A l'Assemblée de Grenoble.



M. DC. XV.

67704

1911.10.10

1911.10.10


1911.10.10

1912

13

VX 0011





A D V I S

D O N N E P A R

M O N S I E U R L E

Mareschal des Diguieres,

*A l'Assemblée de Grenoble.*



ESSIEURS les Deputez des Eglises reformées de ce Royaume, assemblez, par la permission du Roy, en la ville de Grenoble, ont tousiours fait l'honneur à Monsieur le Mareschal des Diguieres, de rechercher ses aduis sur les principales occurrences de leur Deputation. Il les leur a donnez avec toute sincerité, & autant qu'il a estimé iuste & nécessaire à la manutention desdites Eglises, à la tranquillité de l'Estat, & au respect & seruice deub à sa Majesté par ses tres-humbles subjects & seruiteurs, faisans profession de la vraye Religion ; dequoy il prend Dieu pour

tesmoin, l'appellant à sa ruine & confusion, s'il n'a en cela procedé droictement, & en equité de conscience.

Cecy ce dict par ledit sieur Mareschal, pour ce qui s'est passé en l'Assemblée desdits sieurs Deputez, depuis leur arriuée iusques au dix-neufiesme de Septembre 1615. que ladicte Assemblée a cōmis & enuoyé vers luy vn bon nōbre de ceux de son corps, pour leur cōmuniquer des lettres qu'elle a receuës du Roy, de la Royne, de Messieurs de Rohan, de Sully, & des Deputez qu'elle a enuoyez à la Cour; & le requerrir de luy donner conseil sur lesdites lettres; ce qu'il a sommairement fait ausdits sieurs Commissaires, auxquels il a neantmoins promis de le donner de sa bouche & par escrit à ladite Assemblée.

Satisfaisant à ceste promesse ledit sieur Mareschal, le lundy 21. estant en ladite Assemblée, luy a dit que les lettres de leurs Majestez sont pleines de la demonstration de leur bonne volonté; & que lesdits sieurs de Rohan & de Sully faisoit paroistre par les leurs l'vnion & correspondance, qu'ils vouloient auoir aux resolutions de ladite Assemblée: ce qui ne se pouuoit assez louer, ny eux en estre trop estimez. Mais, que ladite Assemblée (qui semble vouloir prendre resolutiō de se retirer de ceste

ville, à cause que les lettres qu'elle a eues de ses Deputez à la Cour, ne luy font pas beaucoup esperer de la responce au cayer de ses remontrances & requestes) ne doit partir de ladite ville, qu'elle n'ayt eu ladite responce, & les commandemens du Roy. Et si elle n'a le cōtètement qu'elle desire par ladite respōce, il se pourra obtenir, en reïterant les tres-humbles requestes, qui donnent accez à sa Majesté, & qui font qu'elle reçoit & voit ses subjects.

Car, de dire (comme ladite Assemblée a fait dire audit sieur Marechal par lesdits sieurs Commissaires) qu'apres sa sortie de ceste ville elle se retirera & demeurera en corps, en vn autre lieu, ainsi qu'il s'est fait vn peu auant l'Edict de Nantes: Il se respond qu'il n'y auoit nulle paix establie pour ceux de la Religion, qui viuoient sous des tolerances ou trefues en ce temps-là, & qu'à present se donner ceste licence, c'est manifestement rompre ledit Edict, & ruiner les Eglises: joint que lesdits sieurs Deputez ne peuuent faire ce changement de lieu sans le communiquer à leurs Prouinces, & en auoir eu leur aduis, quand mesme ils en auroient la permission du Roy; & ne l'ayant point, c'est outrepasser le commandement de sa Majesté: c'est marquer de la desfiance où il n'y en a nulle occasion: c'est se faire noter de legereté

par vn illicite changement du lieu demandé & accordé : c'est sortir de la reigle : c'est offenser sa Majesté & donner à croire, que ses sujets de la Religion ( qui ont de tout temps monstré aux autres l'exemple d'une parfaicte obeyssance) projettent vne rebellion manifeste, sans aucune cause legitime.

L'offense qu'en receura sa Majesté, sera sensible ; & ne se trouuera que trop de personnes, qui la luy feront sentir plus picquante, spécialement ceux qui se veulent authoriser par les armes, & en auoir la principale & supreme charge, à laquelle ils aspirent.

Il est donc à craindre qu'en voulant faire les mauuais, comme font ceux qui disent, qu'on ne donne rien que par crainte, à la Cour : & essayans s'affermir par des boutades de feu de paille, on ne se trouue enfermé en vne guerre non preueuë & impourueuë, dont les inconueniens sont aussi grands qu'ineuitables.

On a pensé au retardement des mariages ; il n'est plus temps ; le Roy y est trop auancé ; & Monseigneur le Prince, qui est à l'autre extremité du Royaume, ne fait rien qui soit capable pour le différer : mesme il semble qu'il se departe de ceste instance, pour se contenter qu'il soit pris reiglement suiuant les anciennes Ordonnances, qui veulent que les estrangers

n'ayent point de part au Conseil, ny aux offices & benefices du Royaume.

Ces mariages accomplis, & l'esperance de les pouuoir empescher, perdue, il ne faut point doubter que la Royne ne se rende facile à contenter Monseigneur le Prince sur le reste de ses demandes: & desia parloit-on à Tours, d'enuoyer le sieur de Rignac vers Monsieur de Bouillon; & Monsieur de Neuers ( qui se tient neutre ) est tout prest de s'employer à ce traité: joint que comme Monseigneur le Prince est resolu à ne rien attaquer, Monsieur de Boissidaphin est commandé de ne s'auancer point: conjecture qui faict croire que de part & d'autre on ne veut rien desesperer. Il faut donc demeurer dedans les termes de la prudence, pour ne point attirer la haine du trouble de l'Estat sur lesdites Eglises.

Il faut que l'assemblée, par vne singuliere prudence, preiuge de ce qu'elle peut obtenir selon la condition presente de l'Estat & la nostre: nous deuons nous mesurer à ce que nous pouuons, & non à ce que nous voulons: à ce qui ce peut, & non à ce que nous estimons nous estre deu; & ferrer le plustost qu'il sera possible, pour ne demeurer en obiect de malvueillance. L'experience fait ainsi parler ceux qui l'ont, comme ledict sieur Mareschal; pour

attiedir la chaleur bien seante aux plus ieunes.

Si on chemine tousiours par des pendans, sans doute on tombera au precipice de la guerre. Voicy les inconueniens qui en ensuiuront, & qui ne se peuuent euer.

Nous auons voulu rejoindre & faire paroistre nostre vnion, & elle se desmanchera de plus en plus: car il s'y trouuera vn grand nombre de ceux de la Religion, qui (sages & bien aduisez) ne voudront consentir à leur ruine.

Lesdits sieurs Deputez de l'Assemblée, auxquels la paix a esté, sur tout, recommandée, se trouueront desaduouëz à leur retour; & leur sera demandé pourquoy, & cōment ils auront conclu des choses, sur lesquelles ils n'auoient pas seulement charge d'opiner.

Le Roy sera conseillé de prendre le chemin ou de la rigueur, ou de la douceur: si de la douceur, en laissant viure sous ses Edicts ceux qui s'y contiendront, il soustraira à ceux qui auront pris les armes, la pluspart des hōmes, desquels ils pourroient estre assiste; & ainsi il aura bon marché d'eux, & de la ruine des premieres places prises, le fossez des autres seront comblez. Si de la rigueur, en defendant l'exercice, & mal traittant ceux de la Religion, qui n'ont point de retraite, il se perdra, en vn iour deux ou trois cens Eglises, & entre icelles des plus florif-

florissantes, que depuis dixhui& ans en çà on a ( avec beaucoup de peine ) retiré de dessous les ruines, en danger de ne les pouuoir iamais releuer. Les Iesuites leur tiendront le pied sur la gorge; ne perdront pas l'occasion de faire des massacres; trouuans les peuples acharnez contre ceux, qu'ils estimeront auteurs de la guerre.

Les bons François (qui nous plaindroient, & mesme fraterniseroient avec nous, si on nous persecutoit sans sujet) nous auront en detestation, comme personnes inquietes, qui cherchent querelle, & ne peuuent demeurer en repos & à leur aise.

Les Princes & Estats estrangers nous condamneront comme turbulens, qui courent sus au bas aage du Roy; veulent tirer de l'vtilité de toutes les playes du Royaume, & par là affoiblissent autant qu'ils peuuent & les conseils & les forces d'iceluy, seul contre-poids de la Chrestienté, à la grandeur qu'ils redoutent: lesquels, autrement, si on nous vouloit oster nos Edicts, ou nos seurtéz, prendroient nostre defence, & soustiendroient nostre cause.

Les Eglises mesmes ausquelles on laissera la liberté pour le leur vsage qu'ils en retiendront, blasmeront celles qui la mettent en peril, maudiront leurs armes; & de là ( quelque temps

qui puisse arriuer ) vne diuision irreconciliable.

De ceste guerre, en fin, quels en pourront estre les euenemens? Il faut que ceux qui y ont passé depuis quarante ans, & plus, en fassent le iugement. Ils considereront la difference qu'ils ont veüe entre les armes necessaires & celles de gayeté de cœur; entre les resolutions d'un homme de la Religion, pressé & persecuté, & d'un qui peut viure à son aise; se ressouuiendront combien de fois nos peres & nous auons soupiré apres vne telle liberté, que celle que nous auons; remarqueront qu'il n'y a Estat en la Chrestienté, sous vn Prince de contraire Religion, auquel elle soit telle; l'Euangile presché par tout, le Saint Ministère entretenu en partie des finances du Prince, nombre de places & de Garnisons, pour leur seurte, à ses despens, Chambres instituées expres pour leur rendre Iustice. Esquelles choses s'il y a quelques manquemens (comme de faiët il n'y en a que trop) on peut iustement se plaindre, & requerir, qu'elles soient réparées ou supplées, pour de tant plus amender & affermir la cōdition de nos Eglises. Mais nō iusqu'à sortir des limites, soit de cōscience, soit de prudence: de prudence en portant les affaires aux armes, qui ne peuvent estre benites de Dieu,



qu'en tant que iustes; ne sont iustes, qu'en tant que necessaires. De Prudence, en hazardant euidentement contre des armes & plus fortes & plus preparees que les nostres, vne condition certaine, en esperance mal assuree de quelque leger auantage.

Ici on repartira. Que nostre condition n'est pas assuree, puis que ces mariages sont faicts & instituez (disent les Iesuites) pour l'extirpation de l'heresie: sur quoi on peut dire, Qu'un Prince qui préd la fille de son voisin, n'espouse pas ses conseils, ne despouille pas ses propres interets, & ne met pas volontiers le feu à son Estat, pour lui faire plaisir; de quoi on peut donner des exemples. Mais on dira que c'est vne prudence à contre-pied, de se ietter dedans le feu, pour fuir la fumée; d'anticiper sa ruine, pour l'euer: Que nous auons le loisir de voir venir l'orage, & nous preparer à nous en garder: Que iamais il ne reussit bien d'un combat où on est porté par inconuenient, & non par dessein. Apres tout, qu'estans demeurez en nostre deuoir, si on nous veut oster nostre Religion, ou chose, dont nostre liberté ou securté depende, acquise par le sang de nos peres & le nostre, à nous octroyées par ce grand Roy, restaurateur de la France, nous entrerons en ceste carriere, pleins de iustice & de vray

zele ; retrouvuerons en nos poitrines le cœur & la vertu de nos ancestres , serons supportés ; en nostre iuste defence , de tous les bons François , assiste de tous les Princes & Estats qui aiment, soit la vraye Religion, soit le bien de cest Estat ; & (en vn mot) fauorisez de la benediction de Dieu , que nous auons cy deuant manifestement esprouuée en nos iustes armes, qu'il fera reussir à la gloire de son nom , & à l'auancement spirituel de nosdites Eglises.

Ces raisons bien prises , comme elles le doiuent estre de ceste assemblée , la fera aller au chemin du deuoir, allentira les humeurs precipitées , & attiedira les courages trop bouillans , pour estre retenus dedans le deuoir de bons & pacifiques sujets & seruiteurs du Roy. Lequel sera, en ceste façō, esmeu de leur accorder plus qu'ils n'ont esperé, & qu'ils ne pourroient obtenir par les voyes extremes. Dont le dit sieur Mareschal est d'auis, qu'il se faut abstenir , si vne iuste necessité n'y porte les plus paisibles ; & par ainsi , il conseille lestdits sieurs Deputez d'attendre ici ceux, qu'ils on enuoyé à la Majesté , pour auoir son bon plaisir.


Ce n'est pas seulement l'aduis dudit sieur Mareschal , c'est aussi celuy de plusieurs seigneurs de ladite Religion. Il supplie lestdits sieurs Deputez de le prédre, pour son regard, en bōne

part, & s'asseurer que iamais il ne manquera de  
 marcher en toute rondeur pour le bien & a-  
 uantage desdites Eglises, dedans l'vnion desquel-  
 les il demeurera, & dedans l'honneur, & le res-  
 pect qu'il doit & veut rendre à ladiète Assem-  
 blée.

FIN

















Mc

